

太

函

集

太函集卷之七十九

新都汪道昆伯玉著

頌十六首

千秋頌

有序

王居襄高義聞於天子乃賜卷衣致廟書譽王當是時王春秋二十有八禮官請得令園中上壽如令甲王卻之於是吳人汪道昆蜀人馬進階黔人萬廷臯晉人蘇烈陳經正皆待罪守土乃率羣吏請曰高皇帝分王子姓世多賢王要以上結主知下持國是宜莫如王賢者夫草門圭竇之人三十始理男

事及其強仕猶或不能稱上官王始勝衣業已南面
稱令即今諸侯王多善譽而王獨以年少擅場顧乃
退讓不居罷有司母稱賀非所以章盛德脩上儀也
願以爲請王可之諸賓客謁曰古之爲壽者或以卮
酒或以千金夫孰賢於善頌守先羣吏願守爲王頌
之守曰唯唯頌曰

於昭 帝祉延本支兮奄宅南國世德齊兮歷建昭
陽貞攝提兮篤生景胄觀昌暉兮修姱六尺美且仁
兮受茲赤社純德明兮秉心淵塞鏡太清兮謗謗良
士进宵人兮誦法先王操左契兮葆我貞白祛盛麗

今江漢湯湯流豈弟今載其清靜民以治兮明明
天子睦懿親兮乃瞻方國慶賜行兮黼衣朱黻渥采
陳今申錫譽命駿有聲兮東平好脩昭來許兮厥有
河間陳鍾呂兮名實純粹溢終古兮維王幼清孰與
伍兮滔滔盛夏丁令辰兮揆王初度嚮朱明兮卿雲
有爛河漢清兮瞻彼南極燭景星兮僉曰休哉主德
洽兮義問宣昭深不伐兮乃叩司闕排閨闔兮願祝
巍巍享黃髮兮皇皇侯度歛盛容兮悚然意下抱太
冲兮徒縣卻御徹鳴鐘兮乃罷三老謝羣工兮在昔
周澤潤南土兮小心昭事饗純嘏兮帝賚百齡篤周

祐兮王秉謙德滋昌阜兮肆予下吏詘章程兮願承
休德守國經兮方城漢水樹藩屏兮於萬斯年正始
昆兮

壽豈堂頌

有序

博士諸生言處士劉公絕賢請優禮之如令甲劉公
者直指君父也直指君居漢上者三年期當還
關下有司勸駕直指君謝曰存義有大夫在且春秋八
十老矣乃今幸得歸養柰何復事千里游乎守曰何
哉君所以養大人者將必在寒燠薦韁嚮而後可以
望大人之腹乎然此者古人所謂養也非孝也昔曾

元能養有道者少之養志絀矣大人之志何居於是
直指以告處士處士笑曰嘻太守言是自吾父少府
公世受博依余以老詩無聞乃今孺子入官資適逢
世使無忘其舊服庶幾乎骨鯁之臣即而翁家食親
五鼎侈矣不然堂下何啻千里寧能爲咷嚅語邪守
聞之曰善乎處士之言臣子之節章章矣夫忠孝非
兩端也人臣夙夜兢兢務竭其股肱之力求無忝所
生耳語曰事君不忠非孝也然則孝子之盛節其唯
良顯乎哉直指君行矣於是太守執爵而酌處士以
三老之禮禮之會處士考居室之堂太守名之曰壽

豈且爲之頌頌曰

翼翼者堂臨廣漢兮近市不囂蛻紛亂兮江離薜芷
緣井幹兮荆石爲除白章爍兮中有黃髮葆天真兮
翩翩獨世冠切雲兮屬厭六氣郤常珍兮燕譽無疆
昌後人兮矯若游龍不可擾兮之子利見在官沼兮
挾彼風雲洽四表兮毋爲尺蠖甘自稿兮高高鹿門
有遺則兮涉世不夷王迹熄兮授子荀角食舊德兮
微音不嗣闕世澤兮君子之堂同邑里兮紛有姱節
皭不滓兮高門有閭路車止兮發潛闡幽唯令子兮

新都以山顯者曰小華其上有軒轅之跡去百里爲
麓長君講業其間業既成遂有四方之志長君不忘
舊服命作頌焉伯子唯唯頌曰

奕奕天都冠南服兮委蛇百里邇大麓兮厥若綏旛
高不亢兮列仙攸宅帝子降兮若若樓居結疏寮兮
桂樹冬榮秀朱草兮太一爲隣窺衆妙兮北面浮丘
營至道兮保爾幼清蛻汙瀆兮無寧改步趣華轂兮
明明在上際昌阜兮衆芳並進寔繁庶兮乃瞻喚區
不遑處兮明發有懷依故宇兮惟山有靈結成言兮
出王游衍永弗谖兮

西郭草堂頌

有序

商侍中事 莊敬太子籍籍知名旣而中貴人推轂
侍中宜在近習侍中謝不勝任乃以侍中監路馬授
衣如尚方侍中陸沉於鷄鶉貝帶之間皭然不滓於
是公卿大夫爭願交驩侍中已未春正月乙酉侍中
就舍爲會賓客皆造焉旣脩爵賓舉旅行酬相語曰
自 高皇帝定約法中官往往有社稷功乃今給事
禁中宜莫如侍中賢者且春秋五十有三耳居常引
大體多負俗之言少以善射名有奇略內之就養左
右守邇臣之和外之擐甲以臨材官脩封疆之事宜

無不可此社稷之役也顧逡逡退讓惟芻牧是供辭
寵利而不居後名實而不自試侍中獨無意乎侍中
謝曰尚質待罪輿衛月有常餼足以代耕西郭有田
二頃歲收其入足以事賓客寵祿過矣方日夜懼懼
猶恐得過於有司乃若侍 上臥起先意而承事之
則國之長老在尚質寧詎能乎攷令甲中官歲給有
差大都減卿士之半獨在近幸則齋用饒其餘菴菴
耳古大夫有羔羊之節歌者猶或多之即使廉而有
立志不祈多蓄獨不欲致青雲依日月乎哉季子薄
負郭之田二頃以車裂終然則侍中之所以擇術者

賢於季子遠甚彼其視六國之輜重直土苴耳此非遠昭曠之道惡能辨此邪乃命酌者行觴余爲之頌曰

有堂翼翼爛金鋪兮辛夷爲楣蘭爲疏兮樹蕙百畊
畦揭車兮隔閨朝市城之隅兮淑人洵美習燕游兮
有馬歛玉出長楸兮冕紱充庭列公侯兮千金爲爵
萬年酬兮承明廣內多寵靈兮戒爾亦曷蹈國經兮
車輪曳踵涉春冰兮無寧郤步以葆真兮懷瑜握瑾
闕中藏兮深厚不伐謀則臧兮願言壽穀享無疆兮
以燕以譽君子堂兮

率更堂頌

有序

元年 上即位 羅仲子應鶴舉明經 郡中先後舉者無慮數十百人乃若急不業遠有司則籍籍稱仲子都人士言仲子父處士長者宜仲子賢 上四年都大夫以率更之禮禮處士處士於是乎始杖以四頭歸聚族于堂遍爲處士壽處士肅諸父老次諸兄弟次學士諸生諸父老乃酌上尊爲合語吾宗自豫章來徙累世益州顧鄉曲之譽歸焉則諸長老在頃者一夫受法株連吾宗席宗祏之靈不失世祀諸長老往矣儀刑之謂何乃今所謂老成人則唯處士郡大

夫其將樹處士爲閭里率誰曰不宜諸兄弟鷹行而前執爵而羞處士淮海爲天子外府上賈居之吾宗雄跱其間何論陽翟要以富而好行其德寧詎人能乎處士少孤力以故資起務矜已諾振人之窮嘗郤賈豎朱氏金歸寢人子舍其直由是聲聞淮海至今誦義不衰郡大夫賓處士於鄉其以勸鄉之爲良賈者旣而學士諸生旅進修爵而言處士有子七人擇能者使受經術諸子多所就業而仲子先鳴處士日討仲子而訓之舉子猶處子也不笄而字其能婦者幾何吾鄉文獻舊都姬姜之所自出孺子勉矣

其母失教於公宮羅氏自建炎以還先後顯者多不
譽乃仲子兢兢奉教壹稟於正經有開必先處士是
已郡大夫敬事處士將令訓子者取則焉不佞幸以
禮起家惡敢謂知禮意自不佞家食里俗波流羣少
爲政而老不及聞學者買者不復爲名高而壹歸乎
厚利處士方以行義取重俗其有瘳乎觀於鄉而知
王道固非虛語仲子從吾宗受室宗丈人屬不佞頌
之不佞唯唯頌曰

瀼川泱泱載自豫章殷殷露積奕世相望處士承家
藐焉六尺操箋趨時迺倍疇昔義聲籍甚窮乏歸心

寧孤而子寧攫而金爰及中年有子競奕末利何爲
蓋歸吾黨之子受賈之子受詩豈惟博依太史作師
一輩翩翩厥有仲氏鵬在成均鴻在博士仲承彝訓
惟日孜孜下帷修業不恩有司維仲之良具曰有考
始也克虔終譽可保煌煌俎豆奕奕橋門禮儀必度
慎乃司存誰其主之大夫執禮誰其作賓處士則以
邦人具在適觀厥成載在惇史蔚爲國經嘉言滿堂
度越金石小子作頌播之無斁

燕喜堂頌

有序

吾邑中蔣氏最著世擅素封諸少年結客而游其齋

用與千乘等擊鍾列鼎日以爲常吾舅次公舉宗所謂魁然丈夫也舅席王舅故業其貲足豪嘗東爲岱之游游道廣矣及王舅且老遂釋業西歸居于舍者數年王舅見倍事王母加謹終不復東當是時諸蔣方鼎盛人人謂舅使次公猶然在賈其盛可知何爲是棲棲耳舅謝曰吾嘗周游四方習千金之子旣又省吾甥闕下主吾宗定西舍習僕家視諸富貴者容蓋嘗目攝之矣彼富貴適來者也賓也吾父母吾妻子吾所待而爲吾者也生也吾不斂柰何倍主而從賓且吾聞之苟可以食不必八珍苟可以飲不必

必六齊吾父不逮而吾母存吾率吾妻吾子環而侍之吾母春秋高視子姓咸在飯菽飲水卽八珍六齊不啻也歲乙丑舅行年五十而王母始稱老焉道昆越在南疆皆不得登堂爲壽於是北鄉而酌者再且致燕喜之頌云頌曰

有堂奕奕切天都兮桂棟蘭橑辛夷櫨兮流雲在戶虛白居兮吉祥止止儼華胥兮都房樹譟紛綽約兮朱艸充庭羅廣薄兮蟠桃三千果有碩兮西降王母侍方朔兮維春及秋撫令辰兮子弧母帨縣高門兮高門有閨朝日瞰兮姣服如雲盛後昆兮湯谷爲尊

露爲醴兮兕觥爲壽史迭起兮水周堂下集鮀鯉兮
式燕以教胥樂只兮東隣椎牛西剗羊兮朝召許史
幕金張兮輿臺異采馬異糧兮福澤盈眦意揚揚兮
猗與碩人操獨見兮葆真守白去健羨兮潔爾晨羞
豐夕膳兮家慶翩翩無畔援兮我思古昔純德同兮
孜孜惟日藐三公兮燠寒必在甘毳充兮惡用遠駕
馬首東兮維南有山排雲起兮喬松千仞溪瀾瀾兮
山靈呵護閟地紀兮番番黃髮綏福履兮維此勞人
擊一方兮有懷明發不遑將兮生有燭燭而冒兮
北面稽首替無疆兮厥有矣斯頌壽母兮穆如清風

播終古兮堂下有笙應懸鼓兮願言來歸歌且舞兮

立庭頌

有序

方氏祖僕翁而宗黔侯遷聯墅徙巖鎮景真負世俗而從里俗託于賈游汎江陵入巴蜀十年而起十年而饒反歛故居食指滋聚乃考市南之室胥相內而遷之室面南山倍豐樂水左璋谿當綰轂右瀦九龍池其比隣則余內兄子文仲余近屬弟道弘具在閭右始將入室余署其楣曰立庭文仲則曰居第當傳子孫厥有當戶顧名思義肇鑑在焉景真有子斗符授之三禮吾鄉先達率由此起家司馬故嘗受命庚

堂間業子柱下史今茲之事職之主器義在斯乎余
曰其然然未盡也道弘則曰士由與而立禮以爲階
夫禮所以致中故時爲大時易則易時于則于已美
則踰已菲則廢中道而立與時宜之國奢則示之儉
國儉則示之禮里中壯麗相望連櫂萬家不已美乎
故折節而爲儉早服重積其斯爲天下寶與顧上治
烝嘗下治國族卽不翦不斷惡用猶道爲哉乃今有
節有文斌斌然有方之士以此爲訓出入不倍于戶
庭景真未之逮而有志焉伯兄先得之美思可與立
殆庶幾行其庭而見其人乎余曰其然然未盡也吾

所謂立也者非世祿以也其諸季文子之所謂立也者與哉立德立功立言是三不朽禮而不虛之謂德禮而不伐之謂功禮而不愆之謂言無物不在禮矣三而一得儼乎君子之庭疇昔居室莫善于公子荆頌居室莫善于張老景真則子荆之屬也余將效張老頌之頌曰

巖之鄉三天子鄭帝時維白帝庭維黃千秋萬歲樂以康

巖之里豐水瀾瀾爽而不湫姱而不鄙考卜十朋君子所從

巖之門不縣簿而尊客履在戶如雲之屯豈無巷言
心遠不喧

巖之阿雀可羅主人有酒且多一獻百拜無乃苛
執法在前柰酒何

巖之室卓爾有立爲柱爲石爲引爲尺爲平爲城爲
丹爲碧爲德也頎爲功也律爲言也秩繩繩緝緝爾
後之人無斁

三楚升中頌

三楚以民治代興皆楚之良也馨香四達和洽神人
輿誦升聞帝命方外司馬汪道昆勒之石

郡太守雲杜徐公成位

御萬曆兮紀年五恢帝紘兮捲南輔簡在兮秩宗蒞
新都兮守土履帳闈兮望堂皇鏡秋水兮戴春暘振
月題兮釋策馴蹄齒兮周行民嚚兮訟結五辭具兮
片言決近欲間兮躡嚅遠將援兮蹠辟下黃髮兮推
赤心培棫樸兮暢儒林僻常平兮凶無暴秩不逞兮
沃母淫息紛爭兮釋携貳均寢錫兮歸農事順帝則
兮相忘窺海若兮無涘奉繡斧兮東遷笥六籍兮囊
五絃胠篋兮不閉民遮道兮呼蒼天歲功成兮三歷
繕宸居兮北極周澤渥兮溢四封良莫良兮二千石

郡司直武陵龍公膺

倬有美兮稟幼清濟奕世兮蜚英聲剖荆山兮玉質
起丹穴兮鳳鳴出爽鳩兮理南土奉三尺兮具文武
陳衡石兮麗天倫釋桁楊兮祛罪罟柙含光兮直無
形讞吳會兮宥上刑攝三章兮流豈弟周六郡兮民
不寃緣文學兮飾吏牘鼓諸生兮赴正鵠宰榆社兮
蒞齊盟急緇衣兮下白屋吞雲夢兮吊湘魂陟蘭臺
兮括典墳張楚材兮有斐備宣室兮敷陳紛推轂兮
廣路忽一跌兮夷庚將溷夷兮幽惠卜輿論兮憤惝
惝而不平昔周旋兮帝側儼對越兮天則剝岣嶁兮

紀舊德良莫良兮郡司直

海陽令丁公應奉

陸有海兮閑扶棄規百里兮夷大方矯游龍兮沿鄂
渚挾霖雨兮海之陽戢垂天兮八翼沛來蘇兮帝澤
蠲水族兮屏長鯨距汚瀆兮湛空明斥沃焦兮湯沐
浴初日兮盈盈停佚征兮歲萬計罷力役兮歸未耜
因露積兮萬斯倉立平準兮市安肆雨賜僭兮歲殃
僵菜色兮相望既懸磬兮比屋疇閉繩兮關梁遵里
社兮發粟急調饑兮皇皇藉資斧兮良賈職灌輸兮
四方餽饑人兮道路肉白骨兮溝湟粒烝民兮鼓腹

化從目兮爲良虎伏辜兮鬼斧雉委質兮白章翼頹
鯉兮直上茁少城兮芝房反休符兮上帝辭明貺兮
未遑帝鑒兮懔懔良莫良兮楚令尹

竹頌

楚有橘頌作者將有託焉乃今藝竹以萬玉鳴橘不
良于竹也爲之歌楚其治世之音乎作竹頌
荆山之麓稅使車兮閒閒十畝君子廬兮幽篁叢生
徙南服兮佩玉珊瑚無庸璞兮江漢曾波一洗余耳
兮聲中九成余因以隱几兮亭亭姱節脩且貞兮屏
琴捐珮納英聲兮湘靈釋憾愉色喜兮覲覲封君其

將焉比兮鳳鳥來下青琅玕兮既秀而野若可餐兮
雷聲龍見角而翼兮皇人委蛇扈特室兮響應咸池
闢八極兮兩階萬國程司直兮豈不耽耽懷故宇兮
帝命伶倫作鐘呂兮雌雄六鳴中聲舉兮燕郢相望
庭可旅兮

瑞麥頌

有序

歛巖邑也以疆理則田不足什之三以樹藝則禾不足五之一原阪之利率來倍禾耕者田不宜禾三歛而麥居一宜禾則禾爲政麥無征故麥尤爲小人之依其地利袤矣歛蕃生聚以谷量人比三年凶以澤

量辱昔歲淫雨害麥來牟並灾既旱而禾半登曾無
及于溝壑彭令君爲之蒿目爲之薰心旱則暴雩溢
則露禱灾則親問疾則羣饑發廩則躬賑之設糜則
躬餉之日裹餕糧屏輿從策羸馬周行域中探采阻
披蒙茸不啻家至人益之矣是歲邑之西牧里名長
齡令君按轡里中田父遮馬首而薦瑞麥蓋一莖七
穗者若干本一莖五穗者若干本三穗者數十本二
穗者數十百本于是諸父老羅拜都人士前致辭麥
秀兩岐歌人侘爲希有以今視昔什百云乎哉吾儕
小人卽不敢薦之寢廟其斯爲君族之瑞願效之君

侯令君謝曰嘻凶年而有休徵是重吾不德其何以承天之貺聖天子恫瘝寓內加惠元元二三執政相與贊襄一夫有饑由已饑之也監大夫部使者祇承德意日與監司二千石孳孳拊循茲瑞也太上之明馨居中之變理所部之潤澤守土之栽培者也臣好古救罪未能其何與于此其年風雨不僭麥大有秋既則旱甚無禾穀價三倍幸而野無暴骨邑無流亾何所恃之恃麥而已竊惟撫升平而臻瑞應豈不足多要以凝和致祥緩急無預惟夫歲當大殺所獲非常卒之轉禍爲祥災而不害殆猶饑渴之望飲

食寧取辦甘露胡麻乎哉王者以民爲天民以食爲天是惟王者之瑞殆天瑞也昔周獲嘉禾賜周公子魯蓋舉王者之瑞壹歸之乎元勳侈矣然則今茲之瑞也非令君將誰歸不佞道昆載筆而爲之頌頌曰皇輿經畫大啟田功雨暘時若年穀屢豐無平不陂義和用事剗步南郊皇皇雩祀越在丁戊東南游饑樂哉甸服亦旣流離三天子都羣山叢峙食土之毛百夫一耜旱乾水溢輻輳頻仍比隣閭糴市價滋騰暑雨恣睢來牟不粒下民其咨殞尸枕籍令君勞止災切割膚胼胝勿恤後我來蘇乃申行部乃告司徒

乃叩 帝闔沛澤覃敷 帝曰予辜乃蠲乃賑成賦
勿征尚方勿恠令君領領躬問顛連療饑于吻肉骨
于原無突無烟無晦無鑄麰麥漸漸三農畢作嘉生
挺出協氣迴翔一莖七穗展也農祥時而二三時而
四五其穗弘多其徵蕃庶旅陳遺秉于縣大夫反凶
爲瑞君子休符大夫不居歸之守土守土未遑歸之
大府大府避席 天子之休三公四輔入告嘉猷具
曰蒼蒼視下若此恩斯勤斯父母孔邇歲之不易撫
我則親天瑞非天人瑞非人語曰天不人不因人不
天不成民罔常懷懷于有仁皆是物也

人間世頌

與其媚世吾寧遺世與其遺世吾寧玩世毋曰世喪
道母曰道喪世吾將以是出世

養生主頌

胡然而生生胡然而長生胡然而無生予曰有好生
予曰有達生予曰有無住生

大宗師頌

吾宗孔氏爲百世師吾宗老氏爲聖者師吾宗佛氏
爲天人師時而時中孔氏是師時而玄同老氏是師
時而圓通佛氏是師吾無常師吾有餘師吾自得師

吾自喪師

逍遙遊頌

五陵俠遊吾故倦遊五嶽仙遊吾將臥遊采真神遊
疇采疇遊造物天遊疇造疇遊世忞忞爲三遊吾僊
僊爲四遊吾其爲方外遊吾其爲物初遊吾其爲汗
漫遊吾其爲逍遙遊吾適吾適遊無所遊

太函集卷之七十九

太函集卷之八十

新都汪道昆伯玉著

贊二十五首

無量壽佛贊

持世世尊時乘龍象闡教娑婆五色大藏西極至人牛車同鞅沉默非空莊嚴非相其國極樂其壽無量四十八願普度衆生千華世界九品臺城長年丁壯歷劫升平林端甘露羽族和鳴導恒沙衆解脫無明同登彼岸率履夷庚接引何勞跏趺何寂無聖無凡無顯無密無度無迷無通無塞既無無央亦無無極

力曰集
卷之四十一
十方三世斯其第一

彌勒佛贊

是閻非閻彈指便錯是院非院不脩便現是米汁非
米汁川流不息是布袋非布袋撒開無礙被釋迦攬
了行脚被善財偷了鎖鑰剎那間放下皮囊也不問
天親無着

聾真人贊

億乎卿冠不纓遵玉笥傳霞城帝懸解仙骨生刑伯
主郤戎兵辟南面歸上清劖氣騰雷聲聾祠鄉校肇
宗祊式如葛式如彭師誰氏或廣成強名道道無名

又小贊

爾窺竅妙爾契希夷爾象帝先爾和天倪

聾鍊師無名子贊

益襲希夷直窺竅妙象罔冥探祝融高蹈逍遙爾祖
玄同爾師祖武則膠師心則携爾惟無名是曰太樸
非祖非師歸乎寥廓

聾少翁贊

爾生之初茅君畀之特而辱也彊宗睨之天牖其衷
脩短在我自我求之宜無不可漫假而在可脩吾胡
爲而夷猶漫假而骨可肉吾胡爲而溝瀆乃介信使

敦異人求至道陟上乘費不辭雜勞不辭頻玄珠可
握赤水可憑既而天門開仙侶至授九還食五氣羽
化待期神游咸暨遂乃肩文成玩武帝肆滑稽班近
侍脫屣於朝懸壺於市鵬鷺龍蛇惟其所恣及夫周
海岳歷寰區徵莫逆結吾徒藏名闔闢藉口秦盧含
光不刃孰測其都此非我之自我又焉知吾之真吾

貞吉王孫贊

弗袗而衣弗玉而食雲漢爲章典墳爲粒豈無驥褒
龍種則殊具曰天屬展也閼儒

楚恭順王子鎮國將軍仲和小像贊

美且仁鎮公子切雲冠遠游履蘭臺岩岩雄風起伊
余披襟當戶倚河間大雅卓不群肩隨左史窺典墳
初筵授簡紛如雲流商刻羽歌鍾聞延太乙芳天祿
汲中濡芳空谷鳴流水芳濺濺紉蘭芳芳郁郁惟夷
寅歛上征淮南蛻羽翼成藉良史主儀形脩尸祝僕
容聲

別駕吳先生贊

有序

汪伯子曰余嘗讀儒林循吏傳未嘗不忻慕古人所
爲然其致用者較異吳公補學官即能學官及領州
縣則又能州縣卒之去官如脫躡而天子知名是

能睹大體者因爲之贊贊曰

矯矯先生握瑾懷珍纂乃考服蔚有英聲敬敷功令
術士斌斌周諏民隱吏治蒸蒸有覩詭隨言遵直道
頽頽上官容與高蹈 帝曰疇咨旌爾雅操別駕馳
榮名區錫號河汾接軫彭澤並驅光流俎豆譽藉丘
間斯子秩秩君子故居憬彼姱節風於懦夫

汪處士贊

有序

吾宗著休寧西門率用鹽鹽起處士生而廣額巨口
父命曰獅字曰本威年始勝衣輒當室遂賈淮海坐
致不貲悉舉而與仲中分之無德色毋金謂仲自而

未亂以迄今日秋毫皆伯氏功第納伯氏千金然後受券處士固謝不可卒中分毋春秋高處士留居子舍遂罷四方之事築室石渠老焉里俗喜交游往往求通顯者處士兢兢守已子孫脩業而息之乃今歷世阜昌則處士之遺也處士即布衣誦義其亦善始善終者哉贊曰

皇皇烈祖佑啓來孫海陽閭右時維西門處士少孤藐焉當戶握筭中州駸駸起富羽翼仲氏長與戶齊出入攢詔若在墳箋母曰克家繄惟爾力益爾贏金答爾不績伯拜稽首台何敢尸維考之靈維母之慈

亦既中分云胡单厚夫鑒在茲百嘉輜輶高車大蓋
結轍于鄰伊人無黨孝友光明堂有樹謾依依晚節
薄言旋歸敬養無缺中年稅駕考卜石渠授成子姓
高臥于于於赫儀刑儻然在室敬爾烝嘗終古無斁

明處士儉齋先生吳公贊

汪伯子曰余讀汪大夫所爲吳公傳未嘗不忻慕其
爲人嗟乎舉世務奢溢僭差而公以儉德著使公而
在余願操几杖不辭焉贊曰

於皇遙緒時維延陵素封輜輶朱紱雲興末流昌被
豪舉橫行都人連騎縕戶重茵绮歟吳公積居傾縣

負俗獨行折節爲儉衣不完采食不貳膳旣薄紛華亦去健羨丁年任俠躡屩周游垂堂舟楫稅駕林丘言遵舊服倣載先疇評高月旦慶襲弓裘爰及季年遂蒙渥澤黃耇維祺寵章有赫往駕莫援來芳無斁洵美後昆有嚴宗祐

外舅蔣次公贊

有序

舅當少年負盛氣人將以任俠目之舅非俠矣中歲折節跬步不出戶庭人又將以鄉黨自好者目之然非直自好者也居常善事父母盡其驩旣又善事兄子兄諸子諸子或不見德無奪心及兄歿不能喪則

於我殯里俗方席饒溢務芬華舅攻苦茹辛泊如也
旣受章服猶然著處士衣冠明年則春秋六十道昆
不及歸故鄉爲舅壽會有良史能以繪事而擬形容
因之南向醉三且爲之贊其辭曰

山有材芷彼崔嵬君子于懸山有麓其松設謾君子
戢穀山有谿其水漣漪君子期願

外母蔣孺人贊

有序

往余將內子還司馬則外母涕泣命之越二年內子
從余出典郡外母春秋三十有九以暴疾終比出不
虞不遑爲像其後十有五年余自楚入佐邦政載楚

史行史有異能即不見其生得死者狀嘗試爲母不
肖內子爲之沾襟頃之意勃勃如有神肖矣乃今觀
其顰睇壹如疇昔相命時庶幾乎生死存亡即世世
不忘可也毋出夥之韓氏事舅姑以能婦聞外王父
將終亟命毋炊黍作糜以進旣一舉箸顧謂母曰婦
維爾良願以此粒爲爾子若孫以食吾報母雅不得
於姒齧乾百端第謹事之卒未嘗求勝及毋見倍姒
哭之盡哀里俗勿宜媵人勿子孽子毋首舉內子旣
遞舉丈夫子七人顧復爲舅内一姬視其二子如已
子凡此皆足壽者柰何中道歿乎像成余拜稽首而

爲之贊贊曰

熙黃並峙奕奕崇山景星有婺降精于韓言歸豐水
相在考槃聿脩婦事如孟如桓婦事伊何敬共晨夕
展也夔夔申之翼翼舅曰爾勞饗我康食報尔子孫
有如此粒憑凌與祚祚內有言迢迢折節終始無讐
鳴鳩嫗伏息子肩駢薄言進御厥有嬪媛凡今之人
胡不壽考維德之齊允宜偕老爰及中年怒焉不保
逝矣春暉闕茲宿草周南良史能自得師一翬一睇
儻然見之九原可作象服在茲烝禋百世永言孝思

處士方元素像贊

其業博士弃而弗程其旅文士鏘而先鳴其肖莊士
玄酒太羹其風國士莫汲王明其托羽士孚翼未成
其歸處士純白孤貞胡爲其象開士天竺先生其斯
爲振古之士人貌榮名

龍相君小像贊

爾貌則揚皚皚乎若朝雲之麗高唐爾材則良英英
乎若剖和氏而登明堂爾度汪汪洋洋乎浩浩乎若
襟洞庭帶雲夢府萬有而吞三光維爾純龐調調乎
刁刁乎若吹萬而發天籟柴立乎中央之人也左提
原而心廣右挈玉而行方其斯儲精于三湘七澤產

文明之域其斯究極乎典墳丘索發二酉之藏

江處士民瑩像贊

爾脩六瑚芳二豎睨之矯而薄千古芳扶搖濟之堂
上鳴墳芳季吹簫九臯鳴鶴芳倡和齊明霞絢芳可
樂饑白石爛芳甘如飴浮丘耄芳七聖迷哲人萎芳
不憇遺輝顧眄芳燦鬚眉歷周星芳闕天倪藉良史
芳象光儀神如在芳心則夷榮名駐芳人貌馳胡然
而中道芳胡然而期願

宗老禹父甫像贊

甫壯而羸吾見其魁然而亭亭甫獨而謔吾見其铿

然而瑟瑟甫艾而脩吾見其脩然而寥寥甫耆而定吾見其由由然而待盡已焉哉羸則千金訥則環堵脩則萬言定則千古伊余獨睹其全無亦貌之者僅得其終武也邪

處士丁季翁像贊

七策多岐五湖重積任術于名以文滅質古有遺民
侗乎椎直承家菑畬奉國鹽筴豐戒漏卮儉得鳴鏘
展也深藏居然善息造士儒林以亢宗祏惇史乞言
公家受役敦杖于鄉莫櫞于席子姓振振舊德是食
宛在戶庭委貌逢掖若著若存烝畀無斁

吳田吳次公像贊

有序

次公名良佩字惟和近耆卽世四丈夫子謁余志次
公墓乃奉遺像觀余余習次公義甚高因爲之贊贊
曰

入其鄉海陽閭右若掲扶桑式其里肇自有唐故廬
完美見其人昂昂野鶴殆難爲群誦其義讓利如遺
皇皇兼濟于其躬望閭特表賓于瞽宗于其後入轡
齊驅鸞和協奏夙夜宗公季也維札仲也維雍貞而
不黷無庸放言無庸絕俗君子之光儼然冠裳儻然
堂皇著存無射良史載筆尸之宗祏

康堯卿像贊

有序

康生造曰造父名世雍堯卿字也父籍名博士以經術顯郡中父暴亡造年少耳旣長將貌父而尸祝之會吳人屠濬客襄陽善繪事造請濬濬謝曰不見而翁者三十年濬不能貌而翁矣造顙天而禱挾日三濬且行父乃見夢及其覺也操筆圖之肖矣造幸從諸生後願爲先人徼惠焉余聞而奇之遂爲之贊贊曰

其骨俱朽其人不朽其貌無徵其夢有徵寤邪夢邪其孝子之心邪

卷之十一
素庵法師像贊

玉爾談塵金爾戒衣即真即幻疇昔疇非

李和之小像贊

洵有美芳溷人羣賓南極芳武夷君曳露車芳冠切雲蛻汚瀆芳挹清芬其言曰寧伸吾節無寧蹠寧用吾拙無寧顛越之人也顚顚昂昂韞橫而藏純純常常葆真而光胡然而章胡然而相要之貞良

程思玄小像贊

有美一人瞻然不滓爰及丁年乃命良史俯仰無垠色身有此繪事尔工天地一指爲余象之脩尺有咫

槃礴自如不張不弛專視如俟舐筆如矢神則天行
官則知止玉色溫溫展也君子胡然不居歸于無始
維岳維玠不得其死之子全歸脩文接軺中道而瘠
泰山驛騎疇急在原丞鼎顛趾疇膳在胙六尺受注
誰云長夜白日昭只

介弟仲淹贊

有序

昔在甲申肇林大作佛事余主檀樾與二仲俱適左
史自楚來貌三身有半伯氏中立左仲淹右仲嘉翩
翩鴈行脩廣皆不盈搢肖矣明年仲淹病瘻積久滋
深亦越七年無祿卽世須臾掩面族史無良幸而圖

出篋中恍然如在時而對越有若更生龐居士有言
但願空諸所有不願實諸所無要之妙有即真空真
空即妙有仲淹辯此久矣余爲之贊屬子矜書之
儒術尔良躬行尔藏獨觀無始旁燭無疆丁年天放
闕而未章既彊而庭未艾而僵胡然單厚胡然溢亾
吁嗟逝矣莫知其鄉祇園有象左史擅場如蟬斯蛻
如蟄斯房神則懸解形則空忘其居畏壘其人庚桑
千秋尸祝有子無央

余元夫小像贊

元夫客大梁故儒生也良史貌元父而肖元夫橫而

藏之始有子象玄元夫無祿即世象玄則以繪事之
巧力賢于皇尸日一展視之儼然若有見也肅然若
有聞也象玄恃母而父以貞白終余謂象玄于是乎
能孺慕矣且存考氏之亡章母氏之善爲之贊之贊
曰

貌傳說者肖傳說則遇以神貌周公者肖周公則徇
以形乃若年未丁而殂胤未孩而孤象爾睢睢視爾
呱呱是故貌元夫者肖元夫嗚呼將求汝於雲門寧
假我以天步將求汝於夷門晞節俠於朝露將求汝
於墓門惻九原之未寤將求汝於廟門徒匆匆而瞻

顧無寧屬專門之工巧其斯見羹牆於當戶

誄四首

歐陽將軍誄

將軍出唐進士歐陽詹後世家南安將軍幼孤藐焉
獨當戶事大母若母孝遇女弟若兄子有恩立門內
諸孤親母黨始受博士業進國子諸生出事有名公
卿入事鄉士大夫三老豪傑餽問相屬尤急人之窮
嘗發粟賑饑饑者纍纍自列郡至粟且盡則輸境外
粟辦給之窮人來歸輒受生業於是千里趾相錯也
呼孟嘗門少喜兵召里中丁夫習技擊爲保甲隣寇

至亡敢入里中將軍不問家客奉日廣歲用不給則
舍業爲資業中衰久乃力訕遇人有急猶然以身當
其無於是貴游客悉去將軍而諸第交愈益親附市
豪有蟹將軍者容請報之將軍謝曰借交報仇此俠
者事深不武終不能借客資諸客聞之無不頑爲將
軍歟者時倭犯吳越將軍客東海觀兵遂以貲授泉
州衛指揮奉檄就舍會倭薄城下軍府檄將軍勒甲
士保泉州諸甲士負弩躡張賊再敗乃郤軍府知其
材足賴也則以泉州聽將軍將軍遣漳豪何大榮募
漳壯士漳人故嘗德將軍者爭應募得八百人連擊

賊南安同安皆折首尋援漳州進南靖賊創甚悉遁海南月港大猾二十有四人竊將號軍府無所問屬將軍將軍則以羣小乘亂稱兵直負牛佩犧者耳不足問察賊中故多受將軍賜者遣人諭之諸戎首聞將軍名皆蒲伏受命其衆悉下將軍歸而請老謝軍府毋論功其後妖賊林耿起南安多嘯聚軍府謂非將軍不可強起之將軍乃俘耿徇市曹散其黨曾軍府方罷徵調境內虛無兵哨寇者將以閩委倭倭遞至皆踰萬諸脅從驕驕利爲冠蟻附之聚徒積至四十萬人列營連數十里孤城無內備無外援城中寂

歎獨登陴以幸旦夕賊發壕向城求貨不予以尸大家爭慕死士夜縋城各舉棺以匿及游公由方伯入軍府急將軍檄分部監司過將軍於舍監司通軍府意以幣先將軍乃由間道謁游公延爲上客止將軍宿幕府畫諸便宜將軍夜帥輕師襲之破三巢軍聲振矣尋祭山川誓部士因壇而軍客以爲言柰何懸孤軍爲注第申城守乘間出什全毋輕予敵將軍謝曰嗟乎此自盡之術也何謂什全彼其近者環城而傳之遠者絕我糧道即少有蚤暮吾寧能坐斃乎哉吾以一軍當門門以時啓閉彼無扞出入庶幾

猶得繼晨炊且業已成軍背城借一則吾事也吾觀
寇虐太甚彼固當衰天道好還終不以無道蔑有道
吾郡中橫及四鄙下及九原禍亂極矣天將悔禍其
在斯乎間者自賊中來言賊衆食少野無所掠聞將
軍出率首鼠兩端將軍帥潛師覘賊形以輕舟進猝
遇賊賊舉兵前將軍大呼曰來我東田歐陽深也若
能來決一死戰不即趣降賊故憚將軍皆辟易遂麾
兵分道進克七巢乘勝遞擊之遂破尾嶺英林潘徑
水田下浯上塘鄭坑諸砦俘馘渠魁以徇下其餘黨
數千人人授軍府一券以歸官司無所問乃分遣故

部士習賊中者往諭禍福令趣降諸酋惟黃元爵謝
愛夫爲魁羣賊視之爲進止二酋則以將軍之言信
願自下將軍將軍許之羣賊皆解於是洪朝珍柯嘉
勗自漳州至蘇光祚康大福自興化至皆就降降者
無慮數萬人悉授券遣歸願從軍者置部下賊首江
璽李五觀首發難往往發塚陷城懼誅猶薄安平爲
亂郡人無不切齒願甘心焉將軍輒以新兵數千大
破賊俘璽李五觀等凡八礮市中餘黨悉平境內安堵
如故軍府論最 詔進行都司署都指揮僉事戍泉
漳其年倭大入閩破興化軍府檄將軍軍距賊南下

軍瀨溪從賊旣飽人人思挾重潛歸獨忌將軍無所
出會余乞浙師且至賊避興化壁崎頭而將軍進次
東霄距賊十五里而近賊憤則悉以精銳集將軍客
謂將軍請避其銳將軍嘆喟部士義不避綏勉之吾
黨得死所矣遂帥新兵殊死戰賊且郤且前比日入
將軍中矛猶刃二賊以死諸新兵翼將軍出入悉死
之黃元爵奉將軍尸乃得歸歛及余護廩將軍軍至
殲賊酒林後將軍死期僅再踰月人謂將軍以烈死
無讓睢陽事聞 詔賜祭葬立祠錄其子孫世襲指
揮僉事嗟乎將軍故千金子恂恂儒生及其擁虛號

倡義兵惟是軍府咫尺書耳未嘗授一旅之衆僥
之備也亦未嘗起世祿之家當推轂分閭之任也徒
以拊循得士不戰而屈人之兵即宿將在師宜未及
此乃若興化之事爲厲階者誰耶彼或受 詔赴援
且爲將軍脣齒卒之觀望以幸成事並以爵祿考終
飾巾有期異日何面目見將軍地下往閩事急余未
及誅將事將軍子尚書郎述將軍質行甚具余入司
馬習尚書郎賢乃今修死事功司馬事也將軍名在
勲府余請得而誅之其辭曰

赫赫 世宗嘉靖萬邦海隅出日莫不來王島夷從

逆侵軼我疆迄于閩海亂略用張桓桓萬戶時維歐
陽布衣誦義劇季原嘗一呼而集我武維揚郡中底
定爰及清漳引身歸老脫屣戎行天降閩殃殫于壬
戌澤量僵尸禍及枯骨巋然孤城郊壘四塞豈無材
宮蒙彼巾幘誰爲敗謀無庸一卒亦越游公首事決
筴維彼禍區匪伊弗克紹介監司車幣來薄豈伊不
懷父母之國將軍唯唯翻然杖策上謁轅門坐等失
得卷甲夜歸勃有戰色發號選徒紛紛食客登壇誓
師鼓行而出城存與存他不遑恤有如一鷄惡用累
百獨秉潛師躬冒不測厲聲自名聞者褫魄分道前

驅賊吭可扼師無留行遞有俘馘脅從罔治歸爾皆
窟授券爲徵勿復捕格羣凶回面盡解金革凡我無
知甘伏鉄質惟公肆赦投諸阡陌宣言爾來恢恢

帝德逋逃十萬咸與精白彼惛怙終于我典則我旅
維新轉戰逐北乘勝長驅罪人斯獲鈴棘耰鋤還我
舊物惟 帝念功申命有赫旻天不格寇集于莆何
物狂且哆口而呼天兵且至寇何爲乎僕夫不戒奄
忽已湧褫彼戎服竊彼兵符入爲內應寔繁有徒中
夜城壞悉爲夷俘斷斷宿飽故窟封狐血牙膏吻脾
睨歸途將軍至止夙夜援桴神姦不逞亦蓄凶圖先

聲號號組練從吳捐城避舍遵海且逋咫尺相望厥
左營弧今則寢尾昔跋我胡憤興疾視集此睽孤亦
知不敵避難非夫奮衣躍馬志在黃爐敵如脫兔我
則韓盧身先死士肝腦同塗戰不旋踵滅此乃鋪鼓
聲未死白日云徂力窮援絕天奪夷吾嗚呼哀哉凡
此有身得正即斃與幸須臾無寧徇義借曰不貲同
歸九地壯哉國士社稷之衛惟帝好生蠭蟠不廢肉
骨生死閩南萬億胡然不天吉人其肆仲氏世官伯
也主計宜爾阜昌本支百世誰謂冥冥厥有司契爾
躬不閱爾後之利狼瞫如生陵則終殮脩短同條薰

猶異器國事在戎封疆是寄辨以致死引而勿替我
思舊勳敬告疆吏

故授太醫院吏目方長君誄

元年夏四月庚寅故授太醫院吏目方長君卒長君
名錫字天寵歙嚴鎮人其先世由睦州徙歙靈山既
又由靈山徙巖鎮長君少從父受賈賈金陵則以真
州當江淮之交去金陵百里亦一都會也賈人治生
宜莫如真州便父然之其居貨由鄱陽輸真州轉轂
不絕乃帥次君鑛相與戮力居息遂優父大喜曰幸
哉有子吾何四方爲哉遂授政長君歸老巖鎮比長

君爲政生業益饒顧獨以孝友稱內外無間居常喜養生之術徧讀軒岐以下詰書往往投禁方活人甚衆長君所至則負疾者踵至不啻醫門搢紳大夫莫不折節行年六十輒釋業授諸子姪中分之無所私既而杖策東歸踰年而長君歿鄉大夫方先生爲長君狀長君子佐奉狀而乞余言先生爲長君宗人其言可徵信古者生有令聞死則累其質行誄之概於長君爲人於法得誄誄曰

顯允方叔肇跡有周逮漢之季避地睦州考卜靈山奕葉綱繆始遷巖鎮厥若綴旅誰謂涓涓其流瀰瀰

誰謂星星少焉熛起五世其昌既蕃且侈爰及長君
世濟其美濟美伊何卓犖克家薄遊南國睠睨喧囂
輿區孔邇江淮之交庶賈歸富齋用以饒府君嘻嘻
廻車首路保我天年弛我擔負勞勞長君不愆故步
孝友光明昌大門戶旁綜仁術祇受禁方掛名執秩
入貲爲郎遵彼江介迄于鄱陽譬則越人生死存亡
春秋始者知止不殆諸子受成秋毫畢會曰歸曰歸
父老咸在云胡不居游方之外嗚呼哀哉馳驅卒歲
亦埒素封巍巍堂構奕奕亢宗篤生令子蜚英辟雍
纂乃考服綽有遺風班白飾巾胡不黃耆子姓拊膺

鄉鄰疾首人壽幾何孰能長久義問於宣庶幾不朽
嗚呼哀哉

丁孺人誄

丁海陽最程書孺人羅始服 譽命歲閏己亥海陽
以孺人計聞嗟乎孺人已矣天之降割海陽者酷矣
太君疇依獨子疇恃家秉疇任宗室疇尸邪孺人歸
萬戶子舍中世業中否元父恃一逢掖傾三楚之良
供具悉出中厨不謀而辦客有急元父往往脫裝振
之取諸室中其應如響及元父舉楚周游兩都結客
四方垂橐不倦孺人任供億輸樞內如關中旣令海

陽孺人奉太恭人就養仰事聖善俯育岐嶷外肅戶
庭下均服食越在官守內顧以紓攻苦茹辛以相夙
夜昔歲寢疾居半傷于積勞族醫之技旣卽太恭人
爲之戚戚會故人聶少君禮嶽時道出海陽囊中出
五炁丹爲壽毋令妻餽于時太恭人之神益王孺人
霍然就平色潤而腴膚剥而復駿駿有起色矣歲二
月少君遺一匕而行居亡何藥力浸殺孺人長太息
者再呴其飾巾待期元父胥命婺源乃發急足告急
比還報則從卧內詰御人役夫何來對曰婺源至孺
人長太息者再呴其與伯姒同歸乎先是萬婺源有

孺人之喪其于元父則同籍昆弟也既目元父舉嚮者言聞君當赴督學使者期恐不遠吾牖下元父飲泣就道踰月乃歸簿書相仍目不及瞬時方溽暑病者渴欲飲永命女僕以林水軟之移簾而寢牀下飲未及腹痰沸而上行元父急召群醫無所措手則席地而枕之股中夜而終太恭人哭之如喪七鬯元父哭之如喪輔車息子哭之如喪后土嗟乎孺人已矣是足爲夫子相爲士女師天奪之年惜也不佞旣負重傷聞坐談而色變于時以同盟至敬弔元父而誄孺人古者誄不及閨帷自不佞始可也其辭曰

楚矜萊婦居詘如羸朱絃中絕孰起湘靈猗與孺人
羅敷同黨公宮待年秦楚競爽自天作合乃服衿輦
相彼有匹其鳴闢闢公子魁梧萬夫之特九畹崇蘭
襲人芳澤承家不造置驛來賓登嘉薦旨翼我良人
推解已勤然諾勿食如奉漏卮涓涓不塞旣空杼軸
佐以簪裾捉衿露肘雍容自如挾筭南宮游道日廣
資斧何居自中饋往歷十年所奉檄海陽魚軒接軫
姑婦相將婉婉天孫贊茲製錦豈曰無晨鷄鳴交徹
嗣君六尺日訓義方如童斯牿帝藉用減餘力不遺
庭然中歲始於有家終也蓋瘁上池旣涸金液可鋪

庶幾瞑眩從此昭蘇云胡咎徵占自鄰邑二姒同車
歸彼泉室蘊隆當暑薰心如焚巫陽不作誰與招魂
鳳失其曹婺沉于海老不可偕其心未改薄扶廣柳
言就脩塗溢城鄂渚天黯江湖豈無楚妃嫣然殊色
維是貞良令儀靡忒昔駕鑾和祫于吉土天授之符
是爲歸所吉人萎矣天不憖遺是用爲誅女史職之

四十八郎誅

仲淹爲四十八郎贊郎首枕而拜其言謂其父曰願
得九伯父一言而瞑吉甫以告予復誅之
爾志亢宗不閔爾躬徂徠之松曾祖是封尋尺而折

我心如結於乎其以是爲子方訣

哀辭一首

襄莊王哀辭

余守襄 襄莊王獨親守有加禮後十年余至莊王業已棄國人余問園陵去國門百里而近余居楚習爲之歌楚以哀之其辭曰

思皇 先后起郢中些瞻茲近屬茂乃庸些明明嗣服睦周宗些荃胡不居譽命同些繄昔獻王胙赤土些敬共不貳方于魯些維王中興及踵武些綿綿世祀保昌阜些荃胡不居享純嘏些義義主器亶幼清

些胡然而金胡然而玉儼容聲些維仲若季淑且釣
些荃胡不居翼有成些相彼後宮邦之媛些紜縱綺
綺躬爲儉些周南穆木無違怨些荃胡不居尚婉變
些宗公有事序本支些葬蕭執鬯逆皇尸些優然在
位如見之些荃胡不居燕歲時些漢水方城亘千里
些烝烝有衆何可勝齒些巷歌里相輟勿起些於戲
不忘不啻若其考妣些荃胡不居爲民紀些故宮岌
岌鬱雲興些高堂七仞城且平些方連交綺列丹楹
些洞房阿閣藉重裯些荃胡不居四體寧些東壁西
崑壯以麗些長筵曲宴禮樂備些四坐行觴歌旣醉

些荃胡不居主高會些章華授簡盛文章些天青雲
玉獨擅場些仲宣鄴下當鴈行些杜陵奕業揚芬芳
些民歌出牧臨高陽些落日倒載甘楚狂些此皆蟬
蛻何有鄉些荃胡不居相翶翔些高唐之上朝雲幕
些粲粲天人豔初日些輕裾文履紛來集些便娟綽
約麗以則些荃胡不居友琴瑟些翩翩漢浦翔二妃
些英英結佩光陸離些若遠若近揚蛾眉些荃胡不
居引令儀些三湘七澤下秋潦些沅芷澧蘭富芳草
些荃胡不居可終老些陽阿激楚歌雜陳些倡以白
雪和陽春些流商刻羽妙入神些荃胡不居聽其真

些大椿有秋菌無昔些終古同歸彭殤匹些洵美有
子其儀壹些人貌榮名永無射些王公有土可用式
些亂曰靈之來芳夷猶乘白雲兮驅蓐收靈之去兮
阻修扈太一兮總九州懷故宇兮蒿目著遺愛兮千
秋

太函集卷之八十